

河

防

疏

略

河防疏畧卷之十七

義烏朱之錫梅麓甫著

關里屬員孔貞來元起訂
稽山後學徐沁埜公輯

敬陳河漕事宜疏

題爲敬陳河漕事宜以速飛輓大計事竊惟我

朝奠鼎燕京轉漕東南上供

玉食下給百官六軍之需運河一綫悉仍明舊則凡所以利涉者自不得不一循舊章修明而謹守之也
順治十三年以前河道多故糧運率遲自十四年

迄今仰賴

朝廷洪福幸漸免凍阻之患矣第有一二規制或自
明季相沿或有日久弛廢尚須急爲講求者臣謹
徵考故籍爲我

皇上陳之

一曰閘座運河臺莊以南臨清以北原無閘
座節宣每遇旱乾尤易淺閣者姑且勿論
其臺莊以北臨清以南將及千里之內惟
恃山東諸泉之水從石罅泥穴中尺疏寸

導會流於南旺河渠分濟南北而南旺南
距臺莊高一百二十尺北距臨清高九十
尺其間或數十里置一閘或數里置一閘
必上啓下閉互相灌輸方可浮運春夏之
交雨澤愆期源枯流細更必倍費守候以
漸積水然後盈漕否則建瓴之勢一瀉無
餘舟膠而不可行也查會典一款凡運糧
及解送官物並官員軍民商賈等船到閘
務積水至六七板方許開放若公差內外

官員人等乘坐馬快船或站船緊急公務
就於所在驛分給與馬驢過去不許違例
開闢進

貢緊要不在此例又一款凡閘惟進鮮船隻隨到隨
開其餘務待積水若豪強擅開走洩水利
及閘開不依幫次爭鬪者聽閘官拿送管
閘並巡河官究問因而閘壞船隻損失進
貢物件及漂流官糧並傷人者各依律例從重問罪
干礙豪勢官員叅奏究治而且附搭黃馬

快船有禁

貢鮮船隻夾帶有禁令甲森嚴歷歷可攷卽順治十三年十二月內工部

題覆巡漕臣侯于唐申嚴開座等事一疏內開開座啓閉原關糧運務照舊例首先糧艘次及官商等因亦經奉有

依議嚴飭行之

旨奈邇來官差船隻只顧一已速行之私罔念

朝廷京儲之重每到開口輒聽船役喝令啓板么磨

官夫稍有違拗則捶楚繼之積水既洩閘
內糧船不免淺閣即使洩而復蓄亦不免
加倍耽延甚或有隨帶貨船須水浮送則
上閘應閉而不聽閉下閘當開而不容開
年來爭競之端實由於此如是而欲責糧
運之速行無滯是何異於却步而求其前
也除臣屢示禁飭本年四月內具有據報
題叅一疏並將搶閘緣由題

請議飭外但往來滿漢官差絡繹如織河水非易舊典

空存未免由而不察仰懇

睿鑒特賜

嚴飭容臣衙門仍照舊例刊刻紅牌豎立各閘除緊急
兵船暫應讓行外其餘官差船隻一體遵
守隨漕起放如有逼勒官夫開閘搶越洩
水悞運者應拿究者照例問發應叅奏者
據實指叅庶人心知警而漕法不廢此所
宜講者一也

一曰船式重運自過淮後經由黃運兩河抵

通交納黃河逆水溜急運河源流細微必
須船米輕便一律然後可啣尾速輓是以
漕船名曰淺船各省漕糧共計四百萬石
各衛所淺船舊額共計一萬二千餘隻查
會典所開淺船頭稍底棧俱有定式龍口
梁潤不過一丈深不過四尺內隆慶四年
一欵如糧船過淮驗烙之時查有船不如
式者該管官員不分軍職有司一體叅奏
又一欵將江北南京等積年損壞缺船行

督糧道照依湖廣江西二省船式就於瓜
儀設廠打造約載正耗米可五百石務要
底平艙濶入水不深又漕運議單一欵漕
司及各該巡撫等官備查各總下漕船若
干原缺若干補造若干現少若干嚴督各
糧儲道催行該廠補造足額不許仍前僱
覓民船及將損壞者補數派搭本幫以致
船重難行如不足額照例叅奏卽治河書
內亦有開河運船載正米不得過四百石

入水淺不得過六拿六拿者三尺也故船力勝米力水力勝船力若不務足船而徒搭運以省船河力安能運船而漕大困矣歸罪無源之河何益哉等語此皆先年已試之法有可考據者也邇來惟江南山東河南船式米數不異往制江西湖廣浙江漕船梁頭濶至一丈六七尺深至七八尺不等空船入水已四五捺且又船數不足往往倍載票糧入水多至十捺以外如式

船糧經過黃運兩河不難相連而進而一
遇重船在黃河則合幫人夫逐船倒縛始
得過溜在運河則守板蓄水集船起剝倍
費日時一程間斷積而數程相距必遠在
後船隻固被阻壅卽前船之在下閘者緣
上閘候水封閉過時無水下注亦不得不
停橈以待兩河之水勢猶昨而今昔之船
米迥殊雖沿河各官凜遵

功令百計催趲亦豈能別有異術使之飛渡哉除臣已

會同總漕臣檄行各省糧道備查該省漕船因何打造不如淺式又因何缺船倍載不行補造其衛基所額船若干現缺若干今應作何補造議妥通詳以憑覈奪外但比年以來重運回空較之十三年以前爲期雖早而該省船隻屢因體式過重阻礙全漕江西一省尤多違例若不從長酌議誠恐將來必致貽悞合無請

勅該部查議飭行各省糧道遵照舊例漸次補造以備

輓運庶舊制可復而全漕無阻此所宜講者二也河漕事宜雖不止此而此二者實運事遲速之大關鍵也至於言新運者每責成於回空之早然又必自受兌開幫以至過淮一一如期然後抵通上倉無所不早查會典開載重運抵通完糧屢經酌議初則九月爲期嗣始移於六月卽據晁後一條大約自淮以北仍有三月水程而其間必先於冬兌冬開二月過淮之限預爲

嚴切者此可以見由先及後遲早相因之故矣况回空各船苟不至凍阻歲前自亦不難到次是又在該省之受兌開幫力圖振作無致後時耳時已漢秋轉盼新運如果臣言可採伏乞

勅部速議具覆施行再照前議雖有兩款總屬趨運一事不敢分列各疏煩瀆

宸聰統祈

容鑒

康熙二年九月十九日題十月初七日奉

旨該部議奏

工部覆前疏

題爲敬陳河漕事宜以速飛輓大計事工科抄出該
本部覆總督河道朱之錫題前事等因奉

旨該部議奏欽此欽遵於十月初八日抄出到部除船
式一款應聽該部查議外該臣等看得總河臣朱
之錫疏稱臺莊以北臨清以南惟恃諸泉之水會
流南旺邇來官差船隻罔念

朝廷京儲之重每到閘口喝令啓板積水旣洩糧船不免淺擱但往來滿漢官差絡繹如織河水非易舊典空存未免由而不察仰懇

睿鑒特賜

嚴飭容臣仍照舊例刊刻紅牌豎立各閘除緊急兵船暫應讓行外其餘官差船隻一體遵守隨漕起放如有逼勒官夫開閘搶越洩水悞運者應拿究者照例問發應叅奏者據實指叅庶人心知警而漕法不廢等因具

題前來臣等議得凡奉

旨急差與緊急兵船暫應讓行外其餘船隻應如總河
臣所請立牌嚴禁如有不遵許總河臣據實指叅
可也奉

旨已有旨了

戶部覆前疏

題爲敬陳河漕事宜等事該臣等查得總河朱之錫
條議運河往來船隻遵守隨漕啓放不許搶閘洩
水悞運等語已經工部覆明外其船式一款據工

部題稱應聽該部查議前來查十七年六月臣部覆前任倉場楊義題爲漕糧利弊多端等事一疏內糧船之額式宜稽一款查漕船每隻裝米四百五十石不許違式大造等因奉

旨遵行在案今總河朱之錫題稱各省漕船打造不如式并船數不足糧米倍載緣由相應再請

勅總漕各該撫嚴檄漕糧各道務須依式打造其不足船隻務期補造足數如有違式大造於過淮之日驗實指叅以憑議處可也奉

肯依議

河防疏畧

卷之十七

十

寒香館

請復河差三年舊例疏

題爲敬陳河差三年舊例請

勅議復以重河防以收實效事康熙二年十月二十二日准工部咨爲掣差事工科抄出該本部題臣等案查夏鎮分司主事李禧熊於順治十七年八月初一日到任起扣至康熙二年六月二十九日止連閏三年任滿又衛河分司主事田本沛於順治十七年八月十五日到任起扣至康熙二年七月十四日止連閏三年差滿以上二差俱應差官更

替因臣部以前乏員未經掣題今臣等置籤糊名
掣得都水司主事郭諫管理夏鎮虞衡司員外郎
賈雲龍管理衛河俱前往與先差各官交代所有
應領

勅書精微批勘合火牌移文各該衙門照例撰給再查
臣部河差以前俱係三年爲滿今六部司官輪流
陞轉不便仍定三年除中河通惠二差臣部已經
題改一年外其北河南旺夏鎮衛河南河五差應照
中河通惠二差之例俱以一年更替可也相應一

併

題明等因康熙二年十月初六日題初八日奉

旨依議欽此欽遵抄出到部移咨到臣臣查河防一覽書內故明河臣潘季馴題爲申明修守事宜以圖永賴事部覆欵開一久任部臣以精練習前件看得河工最巨治河最難其司道各官非久於其任精於其業鮮克有成者今河臣潘季馴灼知其故申議久任之法特以中南兩河郎中爲請而又舉見任郎中羅胤敬沈修賢能令歷任九年方行優

擢蓋兩河之地甚要則倚辦甚殷且見任郎中既稱得人是誠不可數易者合無悉如所議今後二河郎中員缺勅下吏部卽於工部主事查有曾經分司河上及歷俸稍淺者遴選推補俟後查果職業克修容令歷俸九年方爲破格遷擢其南河郎中羅周敬中河郎中沈修俸資已及六年相應比照陳瑛事例俟其九年考滿方與優叙如有異績卽於京堂缺內推用蓋必有超遷然後可以行久任此又法之相須者也又查故明給事中尹敬題

爲河工告成敷陳善後事宜以圖永利事內開一
重久任以便責成照得事理必閱歷而後熟施爲
必諳練而後精凡一職一事之寄皆然也况河道
之職關係最重議論最多中間地形之險要水勢
之緩急工程之難易經費之盈縮或黎民懼而晏
然或薪積安而厝火或在載籍爲美談而實乖於
至理或在往代爲良畫而不宜於今時使非久於
其任者當之則作聰明者涉穿鑿闢大較者昧設
施蓋涉歷有未諳故臨事多眩瞶耳先年屢經題

准久任然非定立章程甄別淑慝則賢且勞者反淹滯而不才者得苟安非所以勸勤勞而懲惰逸也合無今後自司道以至府州縣管河諸臣俱令久任俾令熟知河務諳練機宜修守有方隄防無失如累歲賢勞著有成效者遇三六年考滿准與加陞職銜令其照舊管事待其資俸最久績效最著然後破格超遷其有遷轉離任者則必就近遴補如管河郎中有缺卽以管理泉閘等主事中選補管河守巡有缺卽於附近守巡各道中選補一

則濡染久而端委相諳一則交承速而職事無曠
又必令其新舊交代新者不至舊者不行不惟人
存政舉緩急有資且使舊政告新傳受有法其爲
河道裨益非淺鮮也至於才志庸劣不堪負荷者
則聽總理憲臣不時奏請更易不必拘年終考覈
因循姑息致誤地方庶幾人思任事而規避不生
事有責成而鉅工可保矣此皆載在舊章慎重其
事者也卽我

朝定鼎之後亦於順治十四年六月初三日准工部

咨爲

請復河差三年舊例以收實效事都水清吏司案呈奉
本部送工科抄出該本部覆總督河道楊方與題
前事內稱竊照黃運兩河上關

國計下係民生工部專差司官三年一換誠慎重其
事也查水性有順逆河流有分合地勢有險要隄
形有高卑某處迎溜作何捲築以當其衝某處掃
灣作何幫護以防其汕至於酌調官夫置辦器具
儲蓄物料栽插柳株一切瑣屑事宜種種皆須幹

濟若非久於其任精於其業鮮克有成者此明河
臣潘季馴疏中語意也季馴治河二十餘年知之
真故言之切而三年一換季馴猶恐不能觀其成
又有六年九年之請尤慎重其事也中河分司前
因滿漢司官並差不便互異故將三年之差改爲
一年之差但司官初到地方河道情形未悉茫然
無措必須經歷歲月稍知頭緒尚未諳練而瓜期
又至矣方且料理交代文冊不暇安有餘力餘心
而治河乎卽有極危極險應修應濬之工不得不

付之後官及後官一到便可卸肩又何暇計河道之濶通堤岸之完固耶前諉之後而後復諉之後河政漸弛漸壞若至不可收拾而思舊例時已晚矣今滿司旣裁漢司方任懇乞

皇上軫念河漕重務將分司三年舊例准復庶河工收久任之效而

國計民生兩有攸賴矣等因順治十四年四月二十五日奉

旨工部議奏欽此欽遵於四月二十七日抄出到部送

司奉此相應議覆案呈到部該臣等案查臣部河
差舊係三年一換後因河道而兼稅課者滿漢並
差不便互異

題改一年今總河臣疏稱滿司旣裁河道事宜必須
久任諳練以觀其成非三年鮮濟誠從河政起見
旣經具

題前來則中河一差相應仍復三年更換其

勅書臣部移文該衙門換給可也等因本年五月十二
日奉

旨依議欽此欽遵抄出到部移咨遵行在案臣又於順

治十六年正月內

題爲慎重河工職守事一疏部覆內看得總河臣朱之錫疏稱通惠河道地畝經圈錢糧甚費若一年一易誰肯爲經久之圖合無准照各河差例改爲三年等因具

題前來查各處河差俱係三年其通惠河於順治十二年六月內因滿漢官同差惟滿官奉公更調不便久任故題照關差一年之例再查先差分司已

經報滿似應更換嗣後新差官員亦應照舊例三年更替可也等因順治十六年二月二十二日題
二十三日奉

旨依議欽此欽遵抄出到部移咨遵行在案該臣看得黃運兩河上關轉漕通塞而民生安危亦於此焉攸寄其間修防之方畧異致節序之流轉相催卽使明欵之官亦必得身親歷練然後當機應變施措咸宜無貽事後之悔以故前明河臣潘季馴有管河分司三年一換猶恐不能觀成請以六年九

年爲滿而科臣尹瑾復以管河司道等官遇三六年考滿加銜照舊管事准與破格超遷之議此皆昔日慎重其事以爲不若此誠不足以專責成而期實效載在河防刻書之中歷歷可攷也卽我

朝前河臣楊方興於順治十四年四月內亦具有

請復河差三年舊例等事一疏臣於順治十六年正月內復具有慎重河工職守事一疏俱經部覆奉有俞旨遵行在案今因六部司官輪流陞轉又兼滿漢並差議將管河分司亦改爲一年更替之例敢不欽

遵

成命第河工關係既重水性變遷爭在呼吸又與他事不同若一年一換初則生手未諳茫然無措及至稍知頭緒而差期已滿年復一年豈免貽誤合無仰請

皇上軫念兩河重計或將兼管鈔務所差滿官一年一換其管河分司漢官仍遵前

旨三年一換差內暫停遷轉俟其回部考覈之後准與叙陞既於

新例無礙而

國計民生可以收駕輕就熟之效所禪河政非淺鮮也臣職掌所關不敢緘默謹特疏冒陳伏乞

睿鑒

勅部議覆施行

康熙二年十一月初二日題本月十四日奉

旨該部議奏

工部覆前疏

題爲敬陳河差三年舊例等事工科抄出該本部覆

總督河道朱之錫題前事等因奉

旨該部議奏欽此欽遵於十一月十五日抄出到部該
臣等看得總河臣朱之錫疏稱前河臣楊方與具有請復河差三年之疏與臣具有慎重河工之疏
各題在案今因六部司官輪流陞轉又兼滿漢並
差將管河分司改爲一年第河工關係既重請將
管河分司仍前三年一換等因具

題前來臣等案查臣部河差原係三年一換先因中
河通惠二差已題定一年是以臣部具

題併將北河南旺夏鎮衛河南河五差請俱改爲一年俱奉有依議之

旨欽遵在案河臣所請不便允從相應仍照前旨遵行可也奉

旨這河差滿漢官俱着三年更換

四舉申明激勸大典疏

題爲申明激勸大典事案照順治十八年八月二十一日准吏部咨開文選清吏司案呈奉本部送吏科抄出該本部會覆河道朱總督題前事等因順治十八年閏七月初五日奉

旨依議欽此欽遵抄出到部送司相應會同議覆該吏部都察院謹遵

旨會議得總督河道統轄五省屬員頗多與巡撫止轄一省者不同今每年河工告竣所薦官員議定額

數應薦差出部司方面共五員有司十員佐貳四員若逾定額不係管轄之官聽部院叅處所薦之官不准註冊如在定額之內俱准註冊奉

旨之後行令該督照新題定例薦舉可也理合具覆恭候

命下轉行遵奉施行等因順治十八年八月初六日奉旨依議本內漢字首行遺落等衙門着添補飭行欽此欽遵抄出到部移咨到臣遵行在案爲照河屬歲修例應甄別節經

題明奉有

俞旨查康熙元年河防告竣臣先經檄行各屬造報賢
否去後節據各司道造報前來臣復嚴加檢覈惟
以本年之內著有成績克濟河防者遵照額例列
之薦剡蓋河工重大夫料繁鉅其間調度催集非
此無以鼓勸兼之本年黃水異漲奔馳搶救各官
勤勞尤所難泯至或別善可稱他端難料苟於河
政無裨者皆臣所不敢贅及也其溺職各官除聞
見所及已經陸續

題叅外茲亦查據揭報分別叅處所有應薦應劾官員謹臚列爲我

皇上陳之

計開

應薦司道官五員

南旺分司工部員外王澧搜泉源於曠邈之區督挑濬於風雪之際南陽花家淺一帶黃運交侵修治緯道重運賴以無停係濟寧道方兆及開報

夏鎮分司工部主事李禧熊疏濬清河渠節
宣閘座調濟夫徭靡不駕輕就熟而接
建鎮城崇墉底績成勞尤自可紀係淮
徐道項錫胤開報

山東左布政使周天爵防河兵餉解發如
期飽騰克賴石香爐夫柳浩繁殫力督
催大工速竣尤覘助勦之効係署按察
使王紀開報

河南左布政使徐化成該省按地出夫僉

派均平剔釐嚴密以故黃流四溢之秋
輸將輻輳昏墊卽寧允稱共濟係署按
察使萬永祚開報

河南分守河北道叅議吳柱黃沁交漲晝
夜河干而且鳩夫辨料鼓勸有方故能
不費公帑克平巨患誠地方之屏翰也
係左布政使徐化成開報

應薦有司官十員

開封府知府武永成開屬險工最繁本年

水患尤烈解夫運柳奉行督催無不咄
嗟立應可稱急公能吏係署按察使萬
永祚開報

兗州府運河同知王有容明敏之才足堪
四應董役則百廢具興僭運則片帆無
阻承委塞決勞績尤多係濟寧道方兆
及開報

開封府南河同知崔維雅沿河三百餘里
奔馳風雨拮据工料不費絲毫之帑克

平泛濫之災勞苦難泯係左布政使徐
化成開報

鎮江府推官王養晦京口爲運道咽喉奉
行挑淺派夫督工勇在任事尅期之間
空重利涉係漕儲道王廷獻開報

兗州府推官余國柱石香爐望青採柳百
餘萬親歷工廠警勵各屬且申嚴科擾
之禁民不知累係左布政使周天禱開

報

濟寧州知州李順昌需樁料則設備有餘
散夫食則侵漁盡絕且水陸之衝供億
兵差勤勞尤著係濟寧道方兆及開報
定陶縣知縣馬之瑛徭役均平夫工無曠
石香爐解柳之外助樁助車助募夫無
不一呼卽應係兗州府推官余國柱開
報

東阿縣知縣劉沛先築壩挑淺不時躬歷
河干查工給食夫沾實惠踴躍爭先係

北河分司高恒豫開報

山陽縣知縣朱禹錫高堰及裏外兩河無
月不親行董覈河有實工夫無冒食有
司中之實心任事者係淮安府推官俞
有章開報

中牟縣知縣朱之翼鼓勸災黎設辦樁籜
諸料露宿堤上晝夜忘勞故不逾時而
狂瀾順軌係開封府知府武永成開報

應薦佐貳官四員

歸德府經歷沈成士委防河汜勞瘁不辭
係歸德府知府宋國榮開報

東平州判官王統濟淺防壩克盡勤勞係
北河分司高恒豫開報

曹縣縣丞張世弘承委催料輸解如期係
兗州府推官余國柱開報

夏津縣主簿朱國材督夫勤勞挑河如式
係北河分司高恒豫開報以上各官所
當薦揚以備叙錄者也

應劾官四員

鄒縣知縣孟醇

一本官玩視河務該縣原額泉夫四十
四名應支工食二百八十八兩原有
設立照票預散各夫收執各將每年
領過銀數據實登填今吊查該縣元
年照票俱係一手填寫朦混顯然窮
夫安賴現在發審

一本官將該縣泉夫帶閏銀九兩六錢

於元年無閏年分混開支給侵冒情
弊不問可知冊票並據係南旺分司
王澧開報

山陽縣裡河主簿周繼文

一本官於順治十六十七兩年新正各
夫投卯索詐叩見節儀每年得銀三
兩六錢共銀七兩二錢後因各夫稱
苦方行中止淺夫郭義熊龍等証

一本官於順治十七年六月內因經河

西地方居民張木匠等六家栽花種菜指稱挖堤詐得叩頭銀一兩有蕭瑞甫不曾與銀本官責伊十五板地方樊應証

一本官查勘裡河涵洞開閉勒索洞頭陋規自順治十六年至康熙元年計四年共得銀二兩二錢地方樊應洞頭高三証係各夫告發經淮安府推官俞有章審實申報以上二官所當

發審追擬者也

歸德府通判李先魁

一本官疎玩成性任事既久呈詳河務
尚多茫昧

一本官每當水漲之期輒以有病請假
濇恐貽悞

一本官祭河賽神留女旦梅五章陪酒
暢飲士民指笑係河南左布政使徐
化成開報

江陰縣志 卷之十一 三十一
榮澤縣主簿黃乘乾

一本官賦性怠惰在工夫役不能稽察
督催一任偷安曠廢

一本官職任管河凡河工大小水勢險
緩物料出入茫無所曉係河南左布
政使徐化成開報以上二官所當分
別議處者也伏乞

勅部再加覆覈如果臣言不謬將王澧等酌量叙錄孟
醇等

勅下審擬李先魁等分別議處庶勸懲聿彰河事有賴
矣

康熙二年十一月二十九日題十二月十七日奉
旨吏部知道

特叅怠玩廳官疏

題爲特叅怠玩廳官以重防河大計事康熙三年五月初三日據中河分司金達喇漢包元辰呈稱蒙臣票開照得邳宿河務同知張四維前據該司轉詳告養及查本官蒞任三載有餘未經考滿似屬規避之情復經行司嚴查去後近見該司文移中有該廳怠玩各項稽遲萬呼不應之語黃運兩河關係何等重大如此怠玩之官安望倚辦但無詳開指實未便入

告合行查取爲此票仰中河分司照票事理卽查張同知怠玩稽遲事件開明密揭封固報院以憑

題叅俟另檄行司查議妥員委署毋得徇庇貽誤河工大有未便蒙此該本司遵依查得河工歲修夫料錢糧俱係

題報事件必由河廳轉文到司據查明白轉詳本部院裁酌具

題近因邳宿河務同知張四維先在河工料理催辦頗勤自康熙二年十一月間被盜之後母老受驚

本官卽動思歸之念一切河務未免懈弛以致呼
應不靈卽釐覈曠盡銀兩一案順治十六十七十
八三年銀冊節蒙本部院差官守催急如星火本
司晝夜焦思自康熙三年正月起至四月十五日
止屢次嚴催該廳並不造冊呈報隨分投提取印
河官經奉本司不得不自行造送又奉本部院檄
行栽植堤園柳株本司於去歲十二月二十二日
備行各河廳嚴催栽補去後各廳俱已報完造冊
在案該廳尚無隻字回覆又康熙二年歲報於三

年正月十七日行廳查造今已四月將終該廳並不遵式造報本司將取到州縣文冊查明改造發廳用印以上各項皆係緊要事件錢糧重務豈容遲悞目今邳宿睢桃黃運兩河各工修防甚殷本司所持者廳官專司所轄料理今該廳既告終養督催諸事廢弛今蒙行查敢不備細呈報等因到臣該臣看得邳宿一帶黃運兩河工程

國計民生關係綦重而董口尤爲運道咽喉黃水漲消無常修防濬築一惟廳官是賴邳宿河務同知

張四維自順治十七年九月內蒞任以來拮据河
干頗盡勤瘁至去冬被盜行劫衰母受驚本官遂
萌歸志具詳告養臣批行司道查例取結仍飭以
加意料理毋致弛誤嗣據該司開報該廳稽遲事
件不一而足雖其養親志切然未經謝事輒多玩
弛則其始勤終怠之咎臣誠不能爲之姑息也除
一面批行該司道查議妥員委署外所有本官怠
玩緣由相應

題叅伏乞

勅部議處所遺員缺速令銓補施行

康熙三年五月初九日題本月二十五日奉

旨張四維着議處具奏該部知道

河防疏畧卷之十八

義烏朱之錫梅麓甫著

闕里屬員孔貞來元起訂

稽山後學徐 沁埜公輯

議覆請裁無益河官疏

題爲請裁無益河官以省冗費事康熙三年閏六月初九日准工部咨工科抄出該本部覆工科左給事中徐惺題前事等因康熙三年五月二十四日題本月三十日奉

旨該部議奏欽此欽遵於五月三十日抄出到部該臣

卷之十一
等看得科臣徐惺疏稱夏鎮工部一差所管河道
不過百里從無沙淤淺澁之患每年額設徭淺夫
工食銀五千餘兩且民間私貼不知凡幾又所管
閘座北有濟寧分司南有呂梁分司何難兼攝况
有徐屬同知泲河通判沛縣主簿三官分管其地
合無將夏鎮一差

勅部議裁或責成濟寧呂梁部司分攝或責成州縣官
專司其事等因具

題前來查得科臣所議徭夫淺夫工食有無民間私

貼其夏鎮分司應否可裁臣部難以懸議相應請
勅總河臣查照科臣疏內事宜叅酌妥確具

題以憑議覆可也等因康熙三年六月十九日題本
月二十一日奉

旨依議欽此欽遵抄出到部移咨到臣准此隨經備行
山東兗東道江南淮海道並中河南旺夏鎮三分
司查議去後續據各司道詳覆到臣該臣看得設
官分職各有專司無益於公家者自不可徒留以
滋擾費有關於

國計者亦未可輕去以悞將來皆不得不慎爲審處者也科臣條議裁併夏鎮一差誠爲節省起見第查該司一署設立有年所轄滕嶧沛三縣河道二百餘里專爲漕輓重計全以人力鑿石成渠惟藉上源諸泉之水滙流濟運少旱則涓流易涸水發則淤沙噴湧時挑時塞工力艱繁中間閘座十有一處地形陡峻有若建瓴止賴啓閉得宜遞相灌注舟丁之逗遛過船之撓梗端緒錯出非所司者調劑其間求其飛輓無阻不可得也至於閘座傾

圮湖流蓄洩修堤度緯隨事施工又皆不容刻廢者且濟寧以南宿遷以北五百餘里官司衙署離河寫遠是以昔日特設分司駐劄夏陽提調南北河道無故似乎修防易辦其如水旱不齊無歲不有方且分身不暇患乎官少若果他司事簡或者不妨就近兼理而南之呂梁分司所轄黃運兩河途長工險北之濟寧分司又專督泉源閘座畫地分理本管工程尚費竭蹶又焉能再爲遠攝致有顧此失彼之虞乎今司道查議僉同臣復詳酌事

勢似應仍舊之爲便也其餘河員亦無冗濫可裁
除夫役更番情由科臣仍有專疏條議另查

題覆外至於所用各州縣夫役原係按地公派每日
官給工食銀三分如遇年歲荒歉餬口不足民間
自爲幫貼或有正身不能應役以及散戶不齊而
轉催他人代應者備資低昂一聽民便原非官爲
徵派也既經各司道呈詳前來相應具

題伏祈

勅部議覆施行

康熙三年十月初九日題本月二十三日奉

旨該部知道

工部覆前疏

題爲請裁無益河官以省冗費事工科抄出該本部覆總督河道朱之錫題前事等因奉

旨該部知道欽此欽遵抄出到部該臣等案查先經科臣徐惺條議裁併夏鎮工部一差及夫食銀兩有無民間私貼其夏鎮分司應否可裁請

勅總河臣確查具

題咨行在案今總河臣疏稱該司所轄河道專爲漕運重計是以特設分司駐劄夏陽提調南北河道而南之呂梁分司北之濟寧分司本管工程尚費竭蹶焉能再爲遠攝似應仍舊爲便至於各州縣夫役按地公派每日給銀三分如歲荒餬口不足民間自爲幫貼或有轉僱代應傭資低昂一聽民便原非官爲徵派等因具

題前來查裁併夏鎮分司并幫貼情由旣經總河臣

查明俱無庸查議可也奉

旨依議

兵船回空轉至疏

題爲兵船回空轉至閘河勢難兼行請

勅酌議暫爲通融以無悞新運事竊照閘河自臺莊以
北臨清以南將及千里原因輓漕重計人力開鑿
成渠哀會衆泉分注南北得雨則泉盈流湧少旱
則涓滴如金故閘河河身從來窄狹中窪旁坡原
難兩舟並溯且南旺爲運河之脊南北地形陡峻
勢等建瓴中間設閘不下五十座全賴遞互節宣
以資利涉每年重運往北回空往南各有程限始

於新運克濟以故運河之啓閉有法偏漕有禁惟首以漕船爲急而餘船皆在次也至若軍行緊急原難拘泥故常但兵船數少則暫停待過爲期非久亦無大悞查臣任內歷年以來經過兵船每起不過數百隻未有奉撤回京凱旋復

命舳艫相接與南下回空輻輳一時如目前之多者今歲東省久旱董口清黃不敵例應築壩攔禦臣前接司道報文據因兵船經過開通稍早未免倒灌又清口淮水力微黃水過盛亦被濁沙淤澱隨於

九月初四日親馳勘督又慮在北回空或爲過往
船隻閉閘稽滯萬一兵船入閘南下愈艱更計兩
口撈濬尚需時日臣一面各發

今旗嚴檄司道等官駐工料理一面亟亟北返逐節
分差併疊飭沿河文武各官乘茲蘇州兵船未到
之時晝夜催趕倘得先過臺莊庶彼此並行兩無
相礙旬餘以來已幸回空五千餘船俱進臨清閘
口至十月初七日過濟者計已及三千隻較之歷
年船數相等固不爲遲惟是寧海將軍臣祖永杰

統領防蘇回京兵船一千五百餘隻據已陸續南
出清口今又將入董口矣董口至閘不過二百里
回空南下正在此時倘兵船一入臺莊即使悉係
輕舟計非半月不能過盡若各船之內再有體式
重大入水較深者又不得不挨船逐閘守板蓄水
曠日需時更難預料况湖廣凱旋兵船臣淮南來
咨文據稱約計需船亦不下一千五百隻已至江
寧指日將到閘河一帶回空魚貫今欲一時並進
勢旣萬萬不能若停橈以待無論凍阻難免即使

臨濟以南天日融和而數千兵船屈指月餘尚難
盡出北關回空各船又安能乘此歲內出口入黃
赴次受兌而副新運之限乎先經臣與總漕臣林
起龍再四商確既不敢阻滯官兵又未可貽悞運
事攢眉相對憂心如焚臣惟兵船糧運均關

國家重務不得已而權衡於兩者之間空回一遲便
難補救兵船少緩尚可通融合無仰請

睿鑒特准兵船暫讓回空先行出關併別項差船共體
國計不致閉關阻隔大約不過數旬之期臺莊以北

回空近三千般可以盡數南下來年新通既免貽
悞而回空過後河道疏通軍行亦不致有所阻碍
矣除臣一面親赴董口與寧海將軍臣祖永杰面
商外謹會同總漕臣林起龍合詞具

題貼黃難盡伏乞

睿賜全覽

勅部速議具覆施行

康熙三年十月十二日題
月
日奉

古

議覆更番河夫疏

題爲請更番河夫以節

國計事康熙三年閏六月初九日准工部咨工科抄
出該本部覆工科左給事中徐惺題前事等因康
熙三年五月二十四日題本月三十日奉

旨該部議奏欽此欽遵於五月三十日抄出到部該臣
等看得科臣徐惺疏稱運河額設夫食錢糧每名
歲食銀十兩八錢而此項夫食各州縣派自地畝
正戶僱募每名又下一二十兩請嗣後各州縣

額夫閹爲上下兩班其不上班者報贖解部倘有衝決大工兩班併力從事每年可節省數萬金錢卽減小民二十萬僱募等因具

題前來查得河工夫役俱係總河專職今議分爲兩班臣部難以懸議相應請

勅總河臣查照科臣疏內事宜逐一酌量妥確具

題以憑議覆可也等因康熙三年六月十九日題本月二十一日奉

旨依議欽此欽遵抄出到部移咨到臣當卽備行董口

以北天津以南各該司道酌議妥確詳報去後續
據中河南河夏鎮南旺北河各分司及沿河各道
詳覆到臣該臣看得運河自董口至天津延長二
千餘里額設夫役除議抽議減并橋閘夫晝夜啓
閉打放空重船隻絕流之日仍同淺夫用工無容
再議外實在徭淺等夫五千九百七十八名今科
臣條議分爲兩班誠爲上省帑金下寬民力起見
臣遵卽檄行司道妥議據稱南北地勢不一工程
修濬亦殊人夫多寡原各因河道險易而設其間

有湖河相聯水沒緯道者有清黃相接於漲不常者甚有地形窪下水勢陡峻一派泥沙隨水噴湧者故旱則患淺潦則易漲惟賴此額夫終歲畚鍤隨時挑濬築護以濟漕運倘遇河道多故卽全夫着役尚往往有不足之憂其間或偶有停曠卽將應支夫食扣存報解該印河官按季設有循環登記查覈該司道仍於每歲造冊報臣臣卽將原冊彙送工部先於順治十六年曾經

題明在案原無容其乘機私扣者也今議分爲兩班

夫力減少捉襟見肘勢必廢弛雖曰遇有急工不妨臨時全調但天時水旱無歲不有夫役徵集倉卒難齊萬一燃眉當前呼應不及誠有如科臣所云一旦有事耽誤重計者不容不慎也况竟郡州縣之夫經臣再四等度別其繁簡除扣曠之外工少年分仍有議扣停曠兩月者其餘撙節之計亦可謂纖悉靡遺矣至於分班之議臣前因夏鎮司屬嶧縣地荒民逃臨河衝苦所有原額夫數曾於順治十六年內檄行該司道分爲兩班少從寬恤

扣曠已久但嶧夫既虧該管河道已患夫少又非徐滕州縣所可援以爲例概從減削者也除覓屬內州縣及嶧縣停曠月分分班夫數照扣曠銀外若其餘州縣概議分班恐誤運事相應照舊仍飭該司道嚴加查覈倘有工程減少人夫逃曠者據實開報扣存曠銀以實河帑如有借名私扣官役侵肥者揭報到臣從重叅處可也既經各該司道呈詳前來相應具

題伏乞

勅部議覆施行

康熙三年十一月初六日題本月二十八日奉

旨工部知道

工部覆前疏

題爲請更番河夫以節

國計事工科抄出該本部覆總督河道朱之錫題前
事等因奉

旨工部知道欽此欽遵抄出到部該臣等案查科臣徐
惺條議河夫閩爲上下兩班其不上班者報曠解

部倘有衝決大工兩班併力從事等因臣部請

勅總河臣酌量妥確具

題在案今總河臣朱之錫疏稱除兗州府所屬州縣及嶧縣停曠月分分班夫數照扣曠銀外若其餘州縣槩議分班恐悞運事相應照舊倘有人夫逃曠據實開報等因具

題前來查更番河夫既經總河臣查明難以更張應如所議其人夫逃走扣曠等項相應請

勅總河臣年終造冊

題報可也奉

旨依議

五舉申明激勸大典疏

題爲申明激勸大典事案照順治十八年八月二十
六日准吏部咨開文選清吏司案呈奉本部送吏
科抄出該本部會覆河道朱總督題前事等因順
治十八年閏七月初五日奉

旨依議欽此欽遵抄出到部送司相因會同議覆該吏
部都察院謹遵

旨會議得總督河道統轄五省屬員頗多與巡撫止轄
一省者不同今每年河工告竣所薦官員議定額

數應薦差出部司方面共五員有司十員佐貳四員若逾定額不係管轄之官聽部院叅處所薦之官不准註冊如在定額之內俱准註冊奉

旨之後行令該督照新題定例薦舉可也理合具覆恭候

命下轉行遵奉施行等因順治十八年八月初六日奉旨依議本內漢字首行遺落等衙門着添補飭行欽此欽遵抄出到部移咨到臣遵行在案爲照河屬歲

修創應甄別節經

題明奉有

俞旨查康熙二年河防告竣臣先經檄行各屬造報賢
否去後節據各司道冊報前來臣復嚴加檢覈惟
就本年之內著有成績克濟河防者遵照定額列
之薦剏苟於河政無裨雖或別政可稱他端難料
皆臣所不敢贅至滿官雖無開薦舊例但中河分
司前因決口一案曾經部覆一體處分註誤旣難
獨寬成勞自宜並錄故敢一併開列其溺職各官
除聞見所及陸續

題叅外茲亦查據揭報分別叅處所有應薦應劾官員謹臚列爲我

呈上陳之

計開

應薦司道官五員

中河分司戶部郎中金達喇漢奔馳於黃
運兩河之間酷暑嚴寒備經勞苦武官
營河勢南徙協同督率寢處河上不費
帑金而險工速竣係淮海道終國禎開

報

中河分司戶部員外郎包元辰防徐邳睢
桃黃河之衝治邳宿運道之淺上下五
百餘里分任宣勞克殫心力故能使狂
瀾底績輸輓無停係淮海道佟國禎開
報

南河分司兵部郎中吳煒淮屬歲修高堰
五大險工稽督維嚴堅完可恃而開挑
芒稻月河二百餘丈疏濬涇河闢下四

十餘里幫築高寶江東堤二百餘里皆
其成勩之難泯者係驛鹽揚州道羅森
開報

北河分司工部主事高恒豫拆修磚閘費
省工堅堪垂永賴且督大挑而晝夜兼
工禦水患而勸輸竣役勞績班班可紀
係東昌道楊陞開報

江南驛鹽揚州道叅政羅森高寶江儀一
帶查閱所至整頓無遺挑濬射陽湖大

工受事月餘卽能嚴催底績誠共濟之
弘才也係江南布政司崔澄開報

應薦有司官十員

河南開封府知府武永成開屬夫柳最稱
繁劇秉公僉派極力督催修防恃以有
濟司郡中翹楚也係大梁道王來用開
報

江南鎮江府知府錢升徒陽河道沙停易
淺不煩催飭而能督屬鳩夫先期勞濟

河防政畧 卷之十一 堤工
空重經臨無阻係布政司崔澄開報

山東兗州府黃河同知黃尊光修守曹單
堤工往來拮据不辭勞瘁石香爐挑濬
引河俾全河順軌節省殊多係濟寧道
方兆及開報

河南開封府推官今陞開封府北河同知
于紀龍當黃流洶湧之日協同守護寢
食不遑而於河工蠹弊留心釐剔洵爲
治河之選係開封府知府武永成開報

山東兗州府泲河通判房星煥督大挑於
風雪之時趨重運於炎日之下殫力驅
馳而啓閉節宣尤能苦心調劑係兗東
道周文華開報

山東濟南府推官錢志進濟屬爲諸源所
滙奉行督飭案牘無畱夫食絕漏卮之
奸泉工有子來之效係分守濟南道閩
廷謨開報

江南揚州府推官王士禎委盤河庫綜覈

精詳至於提搶救之夫嚴包折之禁玩
悞之風爲之一振係驛鹽揚州道羅森
開報

山東兗州府濟寧州知州李順昌濟地兵
差絡繹拮据支應歷著成勞督挑天井
閘河捐資鼓勸群夫更樂爲用係濟寧
道方兆及開報

河南歸德府寧陵縣知縣遲炤夫役均平
協修考城險工絕鮮逃曠應辦柳料更

復完解獨先係歸德府知府宋國榮開
報

山東兗州府汶上縣知縣汪震元南旺大
挑駐工督催全漕攸賴修築上流李家
寺口設辦樁木尤見急工之績係南旺
分司王禮開報

應薦佐貳官四員

山東兗州府照磨楊如楫委督大挑克効
勤劬係濟寧道方兆及開報

江南淮安府山陽縣主簿顧士棟修堤栽柳具徵勞績係南河分司吳煒開報

江南揚州府寶應縣主簿袁坦防堤濬淺河政聿修係揚州府推官王士禛開報河南開封府祥符縣主簿康文禮拮据險工勤於乃職係開封府知府武永成開報以上各官所當照例薦揚以備叙錄者也

應劾官四員

河南長葛縣知縣何勝光

一本官玩視河工柳稍任催不前遲至
水後始行上納無濟急工

一本官智識昏暗坐堂審事一任兩造
喧譁竟日不能判決

一本官年力衰邁動履維艱難司民社
係河南布政使徐化成開報

河南閩鄉縣知縣栗弘猷

一本官漠視河政耳目不靈一任催呼

竟置不理

一本官額夫三十九名不委的役押解
盡行逃去屢次催提延至三月之後
始解夫十七名奉行怠玩貽誤堤工
係河南管河道劉澍開報

江南豐縣主簿袁國器

一本官年力已衰暮氣難振

一本官承催柳料屢費催提急工無賴
係中河分司金達喇漢包元辰開報

河南商丘縣主簿錢樑

一本官年逼桑榆耳目不靈在廠收授
柳梢全無頭緒以致百姓久候賁有
怨聲

一本官所管上工河夫二百四十名一
任逃躲漫無稽查

一本官河工緩急估計埽料茫無調度
係歸德府知府宋國榮開報以上各
官所當照例分別議處者也伏乞

勅部再加覆覈如果臣言不謬將金達喇漢等酌量叙
錄何勝光等分別議處庶勸懲聿彰河事有賴矣

康熙四年二月  日題三月二十六日奉

旨

糧運關係甚鉅疏

題爲糧運關係甚鉅天道元早可虞特

請申明漕禁以全輓輸重計事竊照開河一帶原因漕
輓重計人力開鑿哀漚衆泉分濟南北得雨則泉
流常潤湖櫃可收久旱則泉脉先枯湖身日涸且
南旺爲運河之脊南至臺莊北至臨清地勢窪下
全賴上下四十餘閘遞相灌輸否則一洩無餘舟
膠而不可行矣原與長江大河天然利涉者不可
同日而語也以故運河之水止以六捺爲限故明

會典所載漕船有定式載米有定數取其入水不
淺易於浮送而於各關偏漕之禁尤諄諄三致意
焉且云公差內外官員人等乘坐馬快船或站船
緊急公務就於所在驛分給與馬驢過去不許違
例開闢我

朝順治十三年十二月內亦經工部

題覆巡漕臣侯于唐申嚴開座等事一疏內開開座
啓閉原關糧運務照舊例首先糧艘次及官商等
因奉有依議嚴飭行之

首欲遵在案總緣天時地利不得不然故權衡事勢而
勤爲禁例有如此也况從來瀕河地方春雨常必
舊例惟恃伏秋時雨盛行收入湖櫃接濟下年新
運奈東省自去歲以來乾旱異常境內各山滴水
未發雖竭力支持舊漕幸而告竣然山泉之小者
多枯大者已弱湖水之舊者盡放新者無收臣日
夕憂懸未敢寧處屢經檄行司道廳印等信備集
鄉夫加挑河身多設閘壩搜剔泉源疏通會河務
使一勺無遺盡爲漕用但恐雨澤仍屯來源旣滿

人力雖竭難與天爭實有不得不鯁鯁過計者查
臣於康熙二年九月內具有敬陳河漕等事一疏
內船式一事已經部覆奉

旨頃閱邸抄復經倉場臣白色純等條

奏現行會議然如式打造尚屬遠圖目今急籌尤在
僱剝除一面移咨倉場總漕臣會商不敢瑣陳外
至於閘禁一事已經工部

題覆未奉

俞旨復經兵部覆議內開奉

官差遺及赴任官員船隻仍令糧船讓路放過在諸臣
固因

王事起見但官差各船原聽隨漕啓放未嘗竟阻行
程且所難者不在讓路而在閘板內之涓涓水利
耳若閘禁全弛官差船隻絡繹不絕雖仰體

國計固不乏人其間心急行程惟圖便一己之私不
復顧

京儲之重任往往到閘勒催啓板積水無存閘內糧船
必致淺擱甚有裝載重艦需水浮送船役假藉聚

集多人分守各閘上閘之應閉者強之使開洩水下注則重運之在上者阻矣下閘之應開者強之使閉留水待船則重運之在下者又阻矣當此天旱源微之日即使恪守漕規毫無紊越猶恐輓輸維艱若再視爲末務則涓滴幾何節宣盡廢而欲其沉舟飛渡豈可得哉臣以爲公差緊急雖不能盡由陸路不妨差船漕船兩相照應至於赴任官員南來北往無日無之果使遵照水程卽隨漕而進何致誤限倘志存叱馭則河路紆迴原未禁其

從陸似又不可不盡臣諄以全

國計也仰懇

皇上軫念漕運重務

天語渙頒特賜申飭除緊急差船兩相照應遇便讓行
外其餘船隻務遵禁例隨漕前進毋容船役擁聚
聞上強勒啓閉阻誤糧艘如有故違照例叅究仍
容臣刊刻榜示堅立各閘庶人心有常目之儆而
漕事無廢墮之憂所裨軍
國非淺鮮也貼黃難盡伏乞

睿賜全覽

勅部議覆施行

康熙四年二月十二日題本月二十九日奉

旨據奏東省自去歲乾旱異常山泉之小者多枯大者
已涸湖水之舊者盡放新者無收應差賢能官二員
往看應差官員吏部速開具奏